

COTEENU PEDRO NAAJIONEE

Pedro saruhuatasaacari narta Pueyaso pueya

1 ¹¿Niaate quiyajaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatana cua quiniuria. Janiyari nio naajiya niaacuarani, noo pojoriicuara canapue teiquiyocua niaquecojoquiaari-cuajani: Ponto jiyajinia, Galacia jiyajinia, Capadocia jiyajinia, Asia jiyajinia, Bitinia jiyajinianio. ²Tariucuaacaanu, pa Que Pueyasocuaajaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristo shootenuucua na nanaca, Pueyasoori nia jiyanooquiaa, juhua tojetaarucuaajanaa jeequesano nioojia quiniuria. Na Sohuanuuri nia jataniquiaa tojetaarucua-janaa maninia mijia nia quiniuria, seetanujuanaa Jesucristo tojijia nia quiniuriajuhuaj. Naa Pueyaso panishano pueya nia quiniuucua, nojuaja cuaara cumaquiiria jiyanhua niajaninya. Cuaara nioojia cajitiiria pueyaracaanujuhuaj.

Pa niishiri, paari jiyanhua maninia miishaariquianoni

³Pa Jiyaniijia Jesucristo Que Pueyaso pa maniniuhuaqueetare, jiyanhua maninia na miiniuucua pajaniya. Jiyanhua na taraajenuucua pocua, na pueya pa quiniucuajuhuaj, nojuajaari pa niishitiquiaari paari juhua quiariniora

samiitianijiosaanutaniuhuani. Paari naa samiitianijiosaanutaniuhuani, naatej, taa Jesucristo samiitiaquiaarihuacuaani. Naa pa niishishacari taa pa miishaanuta-niyani, paari shitimia sashiquiaani pa miishaanura taa Pueyaso miiniu paniya pajaniyacuaajani. ⁴Naacuajitij, niaari niishiya niaari seetanujuanaa masenuta-niya puetunujuanaa niaarano Pueyaso jiiitiasano jiyocuacaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesosaanu. Maja na naata tariucuaashiniu-jiuhuj. ⁵Pueyasocua nia tiuuniuucua, nojuajaari na cumaacata nia cojuaquiaa. Pueyaracaanu nia cojuanutaniyari nojuaja cuaara nia rijiorejaatijia mijiria taraatia nia quiniujiniji, tojetaarucua-janaa jatanishano quijia nia quiniuria. Jiyanhua maninia Pueyaso miiniu panishano na pueyaranoni, shusha jiyacari niquishaanutaniyari.

⁶Cunora niaari shuquiriaatia quiya. Saniniuuja, niaa naasucuaari taraajeya rupaquijia nia mijiosacari naquiya mijiria. Naajaa, niaa jaara naquiya miishaare, cunoori maja najuhuanaj. ⁷Naquiya pa miiniuni, cunoori pa saniniujiushaanura paate seetanujuanaa Pueyasocua tiuujiacani. Niaacuajaari niishiya, pueyari jiyanhua oro* panijia. Saniniuuja, Pueyasocua pa tiuuniuni, cunoori jiyanhua socua panishano orojiniji. Niaacuajaari niishiya, pueyari oro catijaja, na sanishaanura

maninia oro seetanutejanaa. Naajaa, seetanujuanaa maninia oroori shaajejaju-huaj. Saniniuujia, paa jaara mijiria naquiya pa miiniu rejeretajaca quirini, Pueyasocua tiuujiaca pa quiniuucua, cunoori socua jiyanoehua maninia cunoo shaajeja orojiniji. Pueyasocua nia tiuuniu jaara saniniujiushaare juhua orojuhuaj, jaara seetanujuanaa maninia quiri, Pueyasoori nia timitianutaniya. Naacujitij, Jesucristo muetasacari pocua, Pueyasoori jiyanoehua maninia miiniutianiya nijaniya. Jiyaniijianucua nia jiyatenutaniyari.

⁸Majaari juhuanajuaja Jesucristo nia niquiniu. Naajaa, niaacujajaari na panijiaca. Nia niquishoo na quishacarijia, naajaa, niaari nocua tiuquiquiaa. Niaari na timitiaquiquiaa jiyanoehua. Tojetaarucujanaa jiyanoehua nia timiniu quiniuucua nioojiajinia, majaari nia naata na pohuatana nia rupaata. ⁹Niaari naa timiquiaa, tariucua jatanishano nioojia quiniuucua, Jesucristocua nia tiuushacari.

¹⁰Tariucuaaanu, pueyara Pueyaso sequesano caminiujiuninaa pueyari poojotaquiquiaari taa Pueyaso jiyanooniutianiya nio pa quishacari pueyani, na pueya nojori quiniuria. Nojoriiri tama nojori naajiotasanojuaja suraatia serojojuaca quiquiaari, Pueyaso Sohuanu niishitishano nojori naajiotasanoni. Nojoriiri jiyanoehua niishiniu paniquiaari taa Pueyaso jiyanooniutianiya pueyani.

¹¹Jesucristo Sohuanucujajaari juhuacarijia nojori niishitiquiaari taa Pueyaso jiyarosocoriquiano Pueyano miishaanuta-niya naquiya coteenuni. Nojori niishitiquiaarijiaariuhuaj, naquiya na miiniu nuhuaji saniniuujia, nojuajaari Jiyaniijiarajanaa jiyatesaanutaniya, shacantuuca quijia na quiniuria. Naaratej, nojoriiri maninia na niishiniuria saniniujuquiaari juucua, cantejaara cuno

quiniutianiya, Pueyaso Jiyarosocoriquianoni, naajuhuaj, taacari na muetanutaniyari. ¹²Pueyasoori saaja nojori niishitiquiaari, na Sohuanu poojotanishano nojorini, cunoori maja tama nojoririjaja na quiniu quiquiaari. Cuarta Pueyaso pueyanaa, icunoori niaarano quiquiaari seetanujuanaa! iTariucuaaanu poojotasano Pueyaso Jiyarosocoriquianojiniijiri tari tohuateequiaari! Jiyocuaaanuji jiyarosano Pueyaso Sohuanuuri Pueyaso rupaa pohuatanaa cumaquiquiaa, taa na cumaquiquiaari Pueyaso Jiyarosocoriquianojiniji pohuatanaacuaani. Naacujitij, quiari naataja nia tojishano Jesucristojinijini, cunoori supuetanaa pohuatasano quiquiaaricujaja. Pueyaso seyajanaacujajaari pueyarano Pueyaso miishocoriquianoocua maatia niishiniuucua jiaatiaajuhuaj.

Pueyasoori paniya saaja maninia mijiaca pa quiniuria

¹³Cunora, cuarta Pueyaso pueyanaa, jeenucuasano nia quiriquia. Jesucristo muetasacari pocua, Pueyasoori jiyanoehua maninia miiniutianiya pajaniya. Cunora, saaja naa nia miiniu panishaanuucua jiaatiajaca nia quiri. Majaari nioojia niquijiotejaca nia quiniu. Maninia niishiriojojuaca nia quiriquia. ¹⁴Tarijia, niaari tama nia cuaqueya panishanojuaja mijiaca quiquiaari, Pueyaso niishiyashijiaca nia quishacarijia. Quiarijia saniniuujia, niaari na tojijiaca cutara. Naaratej, na muerasu nia quiniuucua, majaari naa quijiaca nia quiniu socua. ¹⁵Saniniuujia, saa maninia mijiacaja nia quiriquia. Pueyasocujajaari nia saquiriojoquiquiaari naa tojetaarucujanaa maninia mijiaca nia quiniuria, juhua nojuajuhuaj. ¹⁶Tariucuaaanu Pueyaso sequesanoori naa naajiotasano quiyaju-huaj:

“Tojetaarucujanaa sesa miyashijiaca nia quiri, taa janiyacuaani”.

¹⁷Nia secojosacari, niaari Pueyaso sequequiaa, “cua Quenaa”. Cunoori maniniacuaja. Naajaa, majaari nia niyajetanu cutara, nojuajaari puetunu pueyajanaa nequesoreenutaniya sesa pa miishanojiniji, maninia pa miishanojinijnio. Majaari rimiajata na saniitionu quiniutianiya. Cunora, mijiria nia quishacarijia, nia puerenuta tama nia cuaqueyajaaja nia cojuare, niaa mariqui na tojiyashijiacara quiriohuari. ¹⁸Pa supuetanaa quiniuucua sesa mijiaaca, paari naa mijiacara quiquiaarijuhuaj. Pueyaso cutaraari naa sesa pa quiniujiniji pa jataniquiaari maninia na muerasu pa quiniuria. Niaacuajaari niishiya, majaari Pueyaso masenu quiquiaari pajaniya orota, platatanio*, shaajeja casaata. ¹⁹Nojuajaari pa masequiaari tama Neyanuniyojua nanacatajaaja. Jesucristoori tama na cuaqueyajaaja tarinitiaquiaari pocuara na mosaanura, na nanaca shoonuucua pa jiyanooshaanura. Tariucuacaanu, borrego jaara Pueyaso niquiara mosaaquiaari na camaru niti, cuno borregoori tojetaarucujanaa borrego maniniu quiquiaari. Naajuhuj, Jesucristoori tojetaarucujanaa maninia mijia quiquiaari. Naacuajitij, nojuajaari tojetaarucujanaa maninia pueyano quiquiaari pa niti na mosaanura. ²⁰Jiya shipiniyaquishacarijia, Jesucristoori tariucua pueya niti mosocoriquiano sequesaaquiaari, sesa mijiaaca jiyanooshaanura. Saniniuujia quiari naataja, nojuajaari shusha mijiria muetaquiaari pocuara na mosaanura, taa Pueyaso miiniu paniquiaari pajaniyaracuajani. ²¹Naa Jesucristo miiniuucua pocuaratej, niaari Pueyasocua tiuquiaa. Pueyasocujaari Neyanu samiitianiquiaariuhua. Na jiyatequiaariiri Jiyaniijiajanaa na quiniuria, shacantuuca cumaacaraca

quijia na quiniuria. Naacuajitij, niaari quiarijia Pueyasocua tiuya, na samiitia-niniuria niajanijahuaj. Naaratej, niaari juhuajaniya sashiya, shacantuuca quijiacara nia jatanishaanurajuhuj.

²²Seetanu rupaajanaa tojitiajaca nia quiniuucua, nioojiaari tari jeequejosaaquiaari, niarta Pueyaso pueya panijiaaca nia quiniuria seetanujanaa. Naaratej, seetanujanaa panitioojua nia quiriquia puetunu nioojiatajanaa, maja sesa nia niishiriojonuta quenaaja. ²³Naa panijiaaca nia quiri, jatanishano pueya nia quiniuucua. Pueyaso rupaacua nia tiuushacari, niaari juhua roosaaquiaariuhua, pueyaracaanu quijiaaca nia quiniuria seetanujanaa. Pueyaso Rupaacuajaari pueyano samiitianijia, saminio na quiniuucua. Naacuajitij, niaari shaajeyashijiacara jatanishaaquiaari pueyaracaanu Quijia rupaacua nia tiuuniuucua. ²⁴Tariucuacaanu Pueyaso Rupaajinia naajiotasanocujaari naa sequeya:

“Puetunu pueyajaanaari rishiyashijiaaca juhua jiyasocua. Na cumaaca, puetunu na jiitiasanojuanaajuhuj, cunoori soreja, juhua naana shuu. Jiyasocuaari soreja. Naana shuurtijia. ²⁵Saniniuujia, Pueyaso Rupaacutaraari pueyaracaanu quijia”.

Cuno rupaacuajaari nia niquiara pohuata-saaquiaari pueyaracaanu quijiacara na jataniniuria niajanija.

2 ¹Naaratej, nia tarinitiare puetunu sesa nia miiniuujanaa. Seetanujanaa nia tarinitiare cuaracashijionu. Naajuhuj, majaari sapuenu juhua maninia pueyano niquishano nia quiniu najuhuanaj. Majaari tamasaca jiitiasanocua jiaatiajaca nia quiniujiuhuj. Majaari coriaacojuaca nia quiniu socua. ²⁻³Niaa jaara tari niishiyacuaja pa Jiyaniijiaari seetanujanaa maninia, na rupaacua jiaatiajaca nia quiricuarajaj. Naatej, taa

shusha rasano conaaja jiaatíaa supuenuu-
cuacuaani, naa Pueyaso Rupaacua
jiaatíajaca nia quiriqíajuhúaj, cumueeca
Pueyaso muerasu nia quiniuria seetanu-
juanaa. Naacujitíj, niocua
tojetaarucujanaa jatanishano pueya
quiri.

**Cristoori juhua saminio saajia,
Pueyaso quiquiorano tiataja**

⁴Saijiníji shipinishano tiaari pueyara-
caanu rishíjia. Naaratej, pa Jiyaniíjiaari
miriqui sequesíya juhua saminio
saajíata Pueyaso quiquiora. Míjiria
Pueyasora tiajonaari jiyaniqíaaari cuno
saajíaaari sesarujúajau. Naaratej, nojori
jijayenetasacari cuno saajia, nojoriiri na
jataqíaaari na ruuretasacari. Nojuaja
cutaraari Pueyaso saajia maniniu, tama
na saquirojosanojuaaaja. Naaratej, nocua
pa tiuuri. ⁵Naajuhúaj, puetunu Jesuucua
tiuujíaca pueyaranojuanaari pueyaraca-
anu rishíjia quiquiorano Pueyasora.
Naacujitíj, Jesuucua pa tiuushacari,
paari juhua maniniujíaca sai Pueyasora-
ni, na quiquiora na tiatajara. Naajuhúaj,
Pueyaso quiquio pa quishacari Neyanu-
cua pa tiuuniuucua, Pueyasoori pa
jijateya pueyacuara secojonaa pa
quiniuria na tacoj. Majaari seya pa
niquitiojonu quiquíaa Pueyasoni, taa
tariucuacaanu pueyacuara secojonaa
pueya miiqíaaaricuani. Paa cutaraari
tama pa cuaqueyajaaja jijatequíaa
Pueyasora pa quiniuriani, puetunu pa
miishanojuanaanio. Puetunu naa pa
miishanojuanaa Jesucristoocua pa
tiuuniuucua, cunoori Pueyaso
timitiquíaa. ⁶Cunora, tariucuacaanu
Pueyaso Rupaajinia, miriqui Pueyaso
sequesano Jesucristojiniíjiiri naa naajíota-
sano quíya:

“Janiyari Sión* tuhuananuucua
jijanoehua cua panishano saajia
nianutaníyani. Cuno saajíaaari tama

cua saquirojosanojuaaaja. Maniniu-
jiajau saajia seetanujuaanaari.
Cante nocua tiuyani, nojuajaari
maja na cararosaanu quiniutiani-
ya”.

⁷Cua panishano pueyanaa, cuno
saajíaacua tiuujíaca nia quiniuucua, cuno
saajíaaari jiyanoehua nia timitiasano.
Nocua tiuyashíjia cutaraari cararosaa-
nutaniya. Nio tariucuacaanu Pueyaso
Rupaajinia naajíotasanoori tari tohuatee-
canu nojoriria. Naa miriqui sequeyari:

“Tiajonaa jatasano saajia, nojori
jijanishacari cuno saajia naasucua
sesarujúajau, cuno saajíacuajaari
socua jiyanoehua panishano saajia-
ra jijatesaaquíaaariuhua”.

⁸Tamaqui, nojuajiniíjiiri naa miriqui
naajíotasano quiyajuhúaj:

“Pueyari cuno saajíaacua tiuriiniutia-
niya. Nocua
jiriatanutaniyajaariuhua na
tiuriiniuria”.

Nojoriiri nocua tiuriiquíaa, nojori
tojíyaquiniuucua Pueyaso rupaa Jesucris-
tojiníji. Pueyasocuaajaari tariucuacaanu
sequequíaaari Neyanuucua tiuyashíjiaaari
tiuriiniutianiya puetunurajanaa.

⁹Niajaniya saniniuuíja, niaari tama
Pueyaso saquirojosano pueyajaaja.
Nojuajaari puetunu niajaniyajanaa
jijatequíaaari nojuaja secojonaa nia
quiniuria pueyacuara, pueyaracaanu na
panishano miijíaca nia quiniuriajuhúaj.
Puetunu niajaniyajanaari tamasaca
pueyapuejiníjinio saquirojosaaquíaaari
saaja Pueyaso pueya nia quiniuria.
Neyanu cusonuta, Pueyasoori naa pa
masequíaaari tama nerajaaja, maninia
Pueyaso miishano pa pohuatanura
tamasaca niquíara. Tariíja, niaacuajaari
juhua ninishíqui quíjiaa quiquíaaari.
Pueyaso cutaraari nioojia cuhuataquíaaari,
seetanujuaanaa shacantuuca cumaacajinia
quíjiaa nia quiniuria nata. ¹⁰Tariucu-

caanu, Jesucristoocua tiuyashijiaca nia quishacarijia, niaari juhua soosano taucuaca quiquiaari Pueyasora. Quiarijia saniniuuja, niaari Pueyaso panishano pueya. Tariucuacaanu, majaari Pueyaso taraajenu quijia niaacua. Quiarijia cutara, niaacua taraajeyari. Cunora, nia jiyanoocuiquaiari.

Pueyaso panishano miijiaca pa quiriquiaj

¹¹Cua panishano cuarta Pueyaso pueyanaa, nia tojiri cua sequesano. Niaari juhua rucoona mijiria. Nio jiyari maja pueyaracaanu pa quijia. Naaratej, majaari tama nia cuaqueya miiniu panishanojuaaja miijiaca nia quiniu, saaja shuquiriaatia nia quiniuria mijiria. Sesa casaacua pa cuaqueya jiaatianuni, cunoori poojia sesojua. ¹²Saaja maninia miijiaca nia quiriquia Pueyaso niishiyashijiaca niquiara. Naacujitij, nojori jaara niaacuara rimiaaqueriquia juhua sesa miijiacara nojori jiyatesacari niajaniya, naajaa. Jiya puequesacari, Pueyasoori puetunu pueyajanaa nequesoreenutaniya. Jiyacari, niaacuara rimiaaquejacaari niishiniutianiya, Pueyasoori tojetaarucua-janaa maninia miijia na saniitiosacari nojori, maninia na miishacari niajaniya saniniuuja.

¹³Pa Jiyaniijia tojijiaca nia quiniucua, puetunu mijiria pa jiitianaa jiyaniijianucua tojitajaca nia quiriquiajuhuaj. Naacujitij, nia jiya jiyaniijajanaa tojijiaca nia quiri. Nojuacuajaari jiyaniijajanaa cutara. ¹⁴Cunora, na jiyatesano jiyaniijianucua tojijiaca nia quiriquiajuhuaj. Nojoricuajaari na jiyaramiquishano, sesa miijiaca saniitio-saanura, maninia miijiaca maniniuhuaqueetasaanura saniniuuja. ¹⁵Naacujitij, saaja maninia miijiaca nia quishacari, niaari niishiyashijiaca sesa miijiaca sanaajanutaniya, najuhuaana nojori sesacasacari niajaniya. Cunora,

Pueyasoori paniya maninia miijiaca nia quiniuria.

¹⁶Tariucuacaanu, Moisés Rootasanoori juhua nia jiyaniijia quijia puetunu niaarajanaa nia tojishocoriquiano. Quiarijia saniniuuja, Jesu cusonuucua nia niti, nojuajaari Moisés Rootasano tohuateequiaari. Naacujitij, nojuajaari Moisés Rootasano sanaajaquiaari niaara. Naacujitij, Moisés Rootasano tonujiya-quishacari niaacuara tari, naajaa, majaari nia jiyaniniu naacujiti nia naata tama nia panishanojuaaja miiniu. Pueyasojua-naacuajaari nia Jiyaniijajanaa cutara. Naaratej, seetanujanaa na tojitajaca seya nia quiriquia cutara. ¹⁷Majaari quenaaja niquiriyatu pueyano rerequeteja nia quiniu. Niarta Pueyaso pueya panijiaca nia quiriquia cutara. Seetanujanaa Pueyaso tojijiaca nia quiriquia. Majaari jiya jiyaniijajanaa rerequetejaca nia quiniu.

Naquiya pa miishacari, sanaa pa rejeretariquia juhua Cristo

¹⁸Poonijotesano pueyanaa, seetanujanaa maninia nia camarnu tojijiaca nia quiriquia. Nia camarnu jaara juaajiaca quiriquia, naajaa, saaja na tojijiaca nia quiriquia. Majaari saaja maninia nia jiitiajaca tojijiaca nia quiniu, nia jiyanoociacano. ¹⁹Niaa jaara juhuajaniya rejeretariquia najuhuaana nia camarnu saniitiosacari niajaniya, cunoori jiyanhua maninia Pueyasora. ²⁰Pueyaso cutaraari maja na timiniu niaa jaara juhuajaniya rejeretare nia camarnu saniitiosacari niajaniya seetanujanaa sesa nia miiniucua. Saniniuuja, nia camarnu jaara saniitiore niajaniya maninia nia miiniucua, niaa jaara na rejeretare juhuajaniya, Pueyasoori cuno timitiaja cutara. ²¹Pueyasocujaari nia saquiriojoquiaari naquiya rejeretajaca nia quiniuria maninia nia miiniucua.

Cristojuanaacuaajaari naquiya miishaa-quiaari maninia na miiniuria pajaniya. Nojuajaari naa miiquiaariti, pa niishiniuria juhua nojuaja pa miiniuriajuhuaj. ²²Cristoori maja quenaaja sesa na miini quiquiaari mijiria na quishacari. Majaari na cuaracashijionu quiquiaari quenaaja-juhuaj. ²³Jaara sesacasaaquiaari, nojuajaari maja quenaaja nojori na riucuanu quijia na juaaniutia. Jaara miitiasaaquiaari, majaari quenaaja nojori na miananajonu quiquiaari. Nojuajaari saaja na Que Pueyasooqua tiuquiquiaari, na niishishacari nojuajaari seetanujuanaa maninia nequesoreena cutara. ²⁴Cristo jaara niyacutesanojinia cusojuasaaquiaari, nojuajaari tari puetunu sesa pa miiniujianaa cusotaquiaari. Naa pa niti Cristo cusonuucuatej, cunoori quiquiaari maninia mijia pa quiniuria saniniujia, maja socua sesa mijia pa quiniuria. Naajuhua, nojuajaari pa niti nootusaaquiaari, pa naatanijiosaanura saniniujia. ²⁵Tarija, niaari juhua tashuquioono borregohua* rucojuaca quiquiaari. Quiaritia saniniujia, niaari nia cojuana Cristoocua tiuquijioquiaari. Nojuacuajaa-ri nioojia jiitiana maniniu.

Camiyono pueyara rootasano

3 ¹Camishano maajipohuanaa, nia niyaca tojitiajaca nia quiriquia maninia. Naacuajitij, nia niyaca jaara Pueyaso rupaacua tiuyashijia quiriquia, naajaa, nojori tojitiajaca nia quiniucua nojoriiri niishiniutianiya Pueyaso Rupaari seetanujuanaa. Nojoriiri naa niishiniutianiya saa maninia mijiajaca nia quishacari, nojori nia pahuataaquishacarija Pueyaso Rupaa. ²Nojori niquishacari tojetaarucujanaa maninia mijia nia quishacari, nojori tojiajaca-juhuaj, saa cunotaja nojoriiri maatia niishiniutianiya Pueyaso Rupaari seetanujuanaa. ³Maajipohuanaa, majaari

nia tacaaniu saaja nia maniniushiniuria, maninia nia niquishaanura. ¿Maajitiiri maniniucuasano, saaja na muecaca na canuusacari maninia, na cushitiasacari orojiniji shipinishano tuhuajashiquia, na cushishacari shanohua toquejuhuaj? ¿Jiyano maajitiiri maniniucuasano jaara juaaniu maniniu quiriquiajuhuaj? Maja. ⁴Naaratej, maninia cutara nia tacaaniuria nioojia nia maniniushitiniuria. Cunora, saaja maninia maaji quiniucua jiaatiajaca nia quiriquia cutara, jacaria pocuajajuhua, maja juaajia. Jiyano maajitij, cunoori seetanujuanaa maninia niquishano Pueyasora cutara. Niaa jaara nioojia maniniushitiri cutara, cunoori seetanujuanaa shaajeyaquiriquiano. ⁵Naajuhua, Pueyasooqua tiuujia tariucacaanu maajipohuari neyaca tojiajaca quiquiaari. Naa nojori miiniucuatej, nojori jiuujiaari seetanujuanaa shanohua maniniushitishano quiquiaari Pueyasora cutara. ⁶Supuetana Abraham niquiocua Saaraari naa neyaca tojiajaca quiquiaari. Seetanujuanaa neyaca tojiajaca nia quishacari, nojuajaari na jiyaniquijia na jiyaniijia. Naacuajitij, niaa jaara maninia mijiajaca quiriquia, niaa jaara nia puereyaquiniutia nia niyaca tojiajaca quiriquiajuhuaj, Pueyasora, niaari Saara nojori.

⁷Najaniyarijata canuunaa, nia niquiocua nia jiitariquia maninia, nia niishishacari maajiiri maja cumueeca juhua cayaja. Majaari na rerequetenu. Maajipohuacuaajaari Pueyaso jiyanoosha-nojuhuaj, taa na jiyanooquiaari njajaniyacuaani. Pueyasoori niaata nojori cojiritianutianiya samiitianijionu, pueyaracaanu rishijia nojori quiniuriajuhuaj. Naacuajitij, maninia nia jiitariquia nia niquiocua, Pueyaso mariqui nojuaja nia secojosano tojiyaquiiri.

Paatucua taa miiriquia parta pueyani

⁸Pueyanaa, cua sequesano quiarijiani, nioori puetunu Pueyaso pueyarajanaa. Pueyaracaanu jiuujiaatioojuaca nia quiri. Majaari juayonuujutanu. Niarta Pueyaso pueya nia cojiriquia taraatia nojori quishacari, shuquiriaatia nojori quishacarijuhuaj. Seetanujuanaa panitioojuaca nia quiri juhua nia tapueyocucata. Taraajetoojuaca nia quirijihuaj. Naajuhuaj, majaari tama nia cuaqueya-jaaja nia jiyatenu juhua socua tojishano pueyano nia quiniuria tamonu pueyanoniji. ⁹Niaa jaara sesa miishaariquia, majaari na naminiu. Naajuhuaj, niaa jaara sesacasaariquia, majaari nojori nia riucuanu nojori nia sesacanurajuhuaj. Saaja maninia nia riuhuanere nojori. Tariucuaaanu, Pueyaso paraca nia quishacarijia, nojuacuaajaari nia saquirio-joquiaari maninia na miiniuria niajaniya. Naaratej, saaja maninia nia miiriquia nia paracajuahuaj. ¹⁰Tariucuaaanu Pueyaso Rupaa-jiniacuajaari naa naajiotasano quiyajuhuaj:

“Cante pueyaracaanu mijiria rishiniucua jiaatiaani, shuquiriaatia na quiniuriajuhuaj, nojuaja cuaara na niti cojuaraa maja sesa na pocuanura. Cuaara na rupaa cojuaraajuhua maja na cuaracashijonura. ¹¹Naajuhuaj, cuaara sesa na mijionu tarinitiaara saaja maninia na miiniuria. Nojuaja cuaara pueya jyanootiooteja quiiria. Cuaara naa maninia na miiniu tarinitiaaquiria. ¹²Cante naa maninia mijiani, Pueyasoori na cojuaja, na secojosano tojjia-jaariuhuaj. Saniniuuja, Pueyasoori sesa mijiaa samiritiaja saaja”.

¹³¿Cantucua sesa nia miiriquiani niaa jaara saaja maninia mijiaa quiriquia?

¹⁴Naajaa, niaa jaara saaja maninia nia

miiniucua miitiasaare, nia timiquiore. Pueyasocuaajaari jyanohua maninia miiniutianiya niajaniya saniniuuja. Mijiria quiniaa miananajosacari niajaniya, majaari puerenu, majaari nioojia nia niquijiotenu. ¹⁵Saniniuuja, nioojiajinia Cristo nia jiyatere nia Jiyaniijajanaara, seetanujuanaa na tojjia nia quiniuria. Juhucarijia nia niishiriojoriquia, jeenucasano nia quiniuria, maninia nia pohuatanura Jesucristojiniji. Naacujitij, niaari jeenucasano quiniutianiya, maninia nia riucuanura tamasaca jaara nequesotare niajaniya, casaara juhujaniya naquiya miiniu rejeretajacate niajaniyani. ¹⁶Jacaria nia pohuatere nia paniniutia nojori, maja nia rerequetenuta nojori. Pueyaracaanu maninia mijiaa nia quiriquia, sesa nia miiniu mariqui nioojia macuhujareeri. Naacujitij, pueyaracaanu shitimia maninia mijiaa nia quishacari Jesucristoocua tiuujiaca nia quiniucua, niaacuara rimiaaquejacaari tama sesa na pocuanuucuaaja caririquiniutianiya.

¹⁷Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniucua, maja sesa nia miiniucua. ¹⁸Cristojuanaa-cuaajaari mosaaquiaari sesa mijiaa pa quiniucua. Majaari socua na pacutenu quiniutianiya cusonu. Nojuajaari tojetaarucujanaa maninia mijia quiquiaari. Naacujitij, nojuajaari sesa mijiaacuara cusoquiaari, Pueyasocua nia jiyatanura niajaniya. Pueyano cuaqueyaraca na quishacari, mosaaquiaariiri. Pueyaracaanu rishijia sohuanuraca na quiniucua, nojuajaari samiitiaquiaarihua. ¹⁹Naa sohuanu na quiniucuatej, nojuajaari macunucua quiquiojinia rosequiaari tii tama nojuajiniijiaaja na pohuatanura macunucua sohuanu. Cuno

pojoriiri nujuatejojuajinia mishiquionucua quiya. ²⁰Cuno pojoriiri, noo pojoricuaja тариусасаану supuetana Noé tojiyashijiaca quiquiaaritij, pueyaracaanu Noé poojotasacari Pueyaso rupaa nojori niquiara juucua. Pueyaracaanu Noé tarishishacari na puereetuca buque na shipinishacari, pajaacuaji na tacajara, Pueyasoori jiyacari cuno sesa mijiaca sashiquiaari juucua. Pueyaracaanu sashiquiaariiri nojori tacatonuhuaa noojiaca nocua juucua. Puetunu mijiria quijiaca pueyajinijiniojuanaani, saaja ocho pueyari cureequiaari, buquejiniaacuma nojori tiuquitianuucua. Puetunu pueya shushiniushacari pajaajinia, cuno pajaari saniniuujia Pueyasooocua tiuujiaacuataniquiaari na buquejinia. ²¹Quiarijia pajaniyara saniniuujia, cuno pajaari miriqui pa niishitiojiya taa Pueyaso miiquiaa pajaniyani, paa jaara moojinia tiuquinishaareni Jesuucua pa tiuushacari. Naatej, taa Noé juhuajaniya cuataquiaari pajaajiniacuani, Pueyasooocua tiuujia na quiniuucua, pueraari naajuhuaj. Naacuajitij, paa jaara moojinia tiuquinishaareni, paari pa timiniutia moojiniji tohuataquiohuani, poojia cajitishano seetanujanaa pa niishishacari paari tari jiyanooshanoni, pocuaji Tacuna Jesucristo samiitianuucua macujiniji. Majaari pa tiuquinishaanu quiquiaa pa seca pa jatanura. ²²Jesucristo samiitiasacariuhua, nojuajaari jiyocuacaanu tacaquiaariuhua. Quiarijia cajiya Pueyaso miaquetajaraari. Jiyaniijijajanaa na quiniuucua, nojuajaari cumaacaraca, tama nojuajaaja na tojitiniuria Pueyaso seya, puetunu cumaacaraca quijiacajanaa, samaruhanio.

Maninia mijiaca pa quiriquia, Pueyaso cumaaca pa jiitianuucua

4 ¹Naacuajiti pueyanaa, naatej, taa Cristo rejeretaquiaari naquiya miiniu mijiria na quishacaricaani, naa rejeretaja-

ca nia quiriquiajuhuaj, niaa jaara naquiya miishaariquia. Naquiya pa miishacari, cunoori sesa pa miiniu pa tarinitijia. ²Naacuajitij, paa jaara naa naquiya miishaariquiani, na nuhuaji paari saaja Pueyasora quiniu paniyani. Paari saaja na panishano miiniu paniyani, maja tama pa cuaqueya panishanojuaja pa miiniuria socua. ³Tarijia, Pueyaso tojiyashijiaca nia quishacarijia pueyanaa, niaari jiyanohua sesa mijiaca quiquiaari, taa Pueyaso niishiyashijiaca miiquiaacuani. Niaari saaja nia cuaqueya miiniu panishanoocua shiiniuquijia quiquiaari. Niaari queraatia tamaatia sesa miiniuucua jiaatijaca quiquiaari. Niaari saaja mashaasequenuujuaca quiquiaari. Nia queranacunuusaqui, niaari tojetaarucujanaa sacuaraatia mijiaca quiquiaari. Niaari rerejojuajuhua puera nia ratunura, jiyanohua nia mashaa-sequenuunurajuhuaj. Naajuhuaj, niaari juaashiquiata shipinishano nia pueyasora nia jiyatesano shuquiritijaca quiquiaari. Niaari na tajoji sacuaraatia pueresano casaa miiquiaarijuhuaj. ⁴Quiarijia saniniuujia, Pueyaso niishiyashijiaca nia cojiyaquishacari naa sacuaraatia nia mijionuratej, nojoriiri jiuujiatequiaa nojori shaacasacari nijaniya. Nojoriiri cunora nia sesacaquiaa. ⁵Cuno pojori cuaara niishiiria nio, Pueyasoori nojori nequesoreenutaniya na nequesoreesacari puetunu pueyajanaa, saminiucua, macunucuanio. Jiyacaritij, nojori cuaara tama nojoriicuaji riucuaaraajaaja. ⁶Cunora, pa Jiyaniijia Jesucristoori macunucua niquiara pohuataquiaari Pueyaso rupaa tama nojuajinijijiaaja, nocua tiuujiacara na jiyatesocoriquiano. Nocua tiuujiaacari pueyaracaanu rishijiaacra quiriquiano, taa Pueyasocuaani. Sesa mijiaca mijiria nojori quiniuucua, nojoriiri pajaajinia cusunuuquiaari taa puetunu pueyajanaa shaajecoquiaacuani. Naajaa, Jesuucua tiuujia cutaraari samiitianijio-saanutaniuhua.

⁷Nio pa quishacarini, paari socua quenaacoya jiya puequesacariicuarani. Naaratej, niishiriojuuaca nia quiriquia. Maninia nia jiitiriagua tama nia cuaqueya-jaaja, saaja Pueyaso secujojuaca nia quiniuria pueyaracaanu. ⁸Jiyanohua panitiojuuaca nia quiriquiajuhuaj. Cunoori socua panishano cutara. Paa jaara panijiaca quiriquiani, paari queraatia sesa miishano jiyanoogia quiniutiani. Naaratej, seetanujanaa panijiaca nia quiriquia. ⁹Niarta Pueyaso pueya jiitiaaquishacari na maquejara, na miaquesocoriquianojuhuaj, nojoriicua taraajeja nia quiriquia. Nojori nia tiuquinitariquia nia tiajinia nia timiniutia. Majaari nojori nia ririjiotanu nia taajenuta. ¹⁰Pueyasocuaajaari na Sohanu niquitioquiaa puetunu na pueyajanaa, tamaatia maninia casaa miiniu niishijiaca pa quiniuria. Naaratej, puetunu nijaniya-janaa cuaara maninia miiria niarta Pueyaso pueya pueyaracaanu, taa Pueyaso cumaquiquiaa nijaniya maninia nia miiniuracuajani. Maninia nia poonijioteriquia Pueyaso cumaaca, nojuaja niquitiojosano nijaniyani. ¹¹Naacuajitij, nia pocuasacari, Pueyasoocua nia tiuuri nojuaja cumaquiniuria nijaniya na panishano nia sequenura. Naajuhuj, niaa jaara casaa miiriquia niarta Pueyaso pueya nia naacunura, nojori nia miiriquia maninia Pueyaso niquitiosano cumaacata. Naa nia miiriquiatej, Pueyaso timitiasaanura socua, Jesucristoocua tiuujiaca nia quiniuucua. Nojuaja cuaara maniniuhua-queetasaaria pueyaracaanu, tojetaarucujanaa maninia miiija na quiniuucua, puetunu cumaacaracajanaa na quiniuucujahuaj. Cuaara naa quiiriatej.

**Juhujaniya pa rejeretare naquiya miiniu,
Pueyaso pueya pa quiniuucua**

¹²Cua panishano cuarta Pueyaso pueyanaa, majaari nia shiriqiniu niaa jaara jiyanoohua naquiya miishaariquia.

Majaari nia jiyaniuijuhuaj saa nijaniyaja naa miishiya. ¹³Niaa jaara naa naquiya miishaariquiatej, nia timiri. Jesucristoocua tiuujiaca nia quiniuucua, niaacuaajaari naa miishiya taa Jesucristo miishaaquiaari naquiyacuaani. Naa naquiya miiniu nia rejeretasacaritij, niaari jiyanoohua timitianutaniya Jesucristo, shacantuuca na cumaacata na tiuquishacariuhua, na jataniniuria nijaniya juhua nojuaja nia quiniuraju-huaj. ¹⁴Naajuhuj, niaa jaara sesacasaariquia Jesucristo tojijiaca nia quiniuucua, shuquiriaatia nia quiriquia. Pueyari naa nia sesacaquiaa, shitimia maninia miijiaca nia quishacari, Pueyaso Sohanuraca nia quiniuucua. ¹⁵Niaa jaara naquiya miishaariquia pueyanaa, cuno cuaara quiri maninia miijiaca nia quiniuucua, maja sesa miijiaca nia quiniuucua. Naa cuaara caririquiiria cutara niaa jaara mojuja quiri, nohuasejo-jua, sesa miiija, timia niishiniu panijia tamasaca casaa. ¹⁶Saniniuuja, maja cutaraari nia caririquiniu niaa jaara naquiya miishaariquia Jesuucua tiuujiaca nia quiniuucua. Saaja Pueyaso nia shuquiritariquia cunora.

¹⁷Quiarijiani, Pueyasoori tama na pueyajaaja saniitioquiaa na tojitiaaqui-shacari na rupaa. Paa jaara naa saniitosaaquiacuaani, ¿taariquitijia noo pojori miishaanutaniya socuatejaj, Jesucristojiniji pohuatasano ruuretajacatej? ¹⁸Naacuajitij, Pueyaso jiyanooshano pueya jaara queraatia naquiya miiquiaa-cuaa, ¿taariquitijia Pueyaso tojiyashijiaca miishaanutaniyatej? ¡Juhuej! Puereeta miishaanutaniyari Pueyaso ruuretajaca, sesa miijiacanio. Nojoriiri jiyanoohua socua naquiya miishaanutaniya, Pueyaso saniitiosacari nojori. ¹⁹Naacuajitij, Pueyaso jaara naa naquiya nia miishaanura paniya, juhujaniya nia rejeretariquia naquiya nia miiniu.

Majaari nia tarinitianu maninia nia miiniu, naquiya nia miishacari. Saaja Pueyasooe nia tiuuriquia nioojia na cojuanura maninia. Nojuacuajaari na Shipininia. Nojuacuajaari saa maniniaja. Naquiya pa miitiquiaacuajaari socua na jeenucuanura pajaniya.

Socua rootasano Pueyaso pueyara

5 ¹Quiarijia saniniuujia cuarta Pueyaso pueyanaa, janiyari nia jiitianaa nacasuyani. Niajaniya, Pueyaso pueya maapue jiitianaanaa, cua tojitiare. Janiyacuajaari Pueyaso pueya maanu jiitianajuhua, juhua niajanijajuhua. Janiyacuajaari pa Jiyaniijajanaa niquiniani, nojuaja jaara naquiya mijioquiaari mijiria na quishacarijia canaata. Naajuhua, nojuajiniji cua pohuatanuucua, janiyari naquiya miishaquiaajaniuhua. Naacuajitij, pa Jiyaniijia muetasacariuhua na shacantuuca cumaacajinia, janiyari jaarajaaja niaata cojiritiasaanutaniya jatanishaanuni, juhua nojuaja pa quiniuria mariyata. ²Cunora Pueyaso pueya jiitianaanaa, shamaatia nia cojuare Pueyaso pueyaniyojua, teyano jiitianaara Pueyaso jiyatequiaari niajaniyacuajani. Maninia nia cojuariquia nojori, seetanujanaa nojori nia paniniutia, taa Pueyaso paniya nojori nia cojuanuracuajani. Majaari nojori nia jiitianu nia taajenuta saaja nojori jiitianaa nia quiniuucua. Naajuhua, majaari nojori jiitianaa nia quiniu saaja cumaneecaacua nia jiaatianuta. Saniniuujia, seetanujanaa nojori nia paniniutia nia jiitariquia niarta Pueyaso pueya. ³Majaari niarta Pueyaso pueya nia jiitianu juhua tama nia seyajaaja. Niajaniya saniya cuara maninia mijiaa quiiria nojori niquiara, nojori niishiniuria na quijiacate Pueyaso pueya, naa nojori miiniurajuhua. ⁴Naacuajitij, pa Jiitianajanaa tiuquisha-

cariuhua jiyocuacaanuji, niaari shacantuuca quijiacara jatanishaanutaniya, pueyaracaanu rishijiaca nia quiniurajuhua.

⁵Niajaniya mashiquiorinia, Pueyaso pueya jiitianaa tojijiaca nia quiriquiajuhua. Puetunu niajanijajanaa Pueyaso pueyanaa, tama nia cuaqueyajaaja nia jiyatere niarta Pueyaso pueyano cumaquiniaa nia quiniuria jaarajaaja. Tariucuacaanu Pueyaso Rupaajiniacuajaari naa naajiotasano quiya:

“Pueyasoori na juaniutia niquijia narta pueya shocoteja. Saniniuujia, narta pueyano shocoteyashijia naacujua cutaraari”.

⁶Naarate pueyanaa, puetunu niarta Pueyaso pueyajanaa nia jiyateriquia tojishano pueya nojori quiniuria niaara. Majaari quenaaja nojori nia rerequetenu. Naa juhujaniya niarta Pueyaso pueya tojijiaca nia quishacaritij, pa Jiyaniijia Jesucristo jaara tiuquiriohua, Pueyasoori na cumaacata nia jiyatenutaniya jiyaniijianucua nia quiniurajuhua. ⁷Pueyanaa, puetunu nia tacaaniujianaa nia niquitiore Pueyaso. Nojuacuajaari niaacua taraajequiaa.

⁸Pueyanaa, nia Paraca sequeeri nia shanacujuquiaa, juhua sare, taa sare shanacujiya na sanura casaacuaani. Cunora, soquejaca nia quiriquia pueyaracaanu. Juhua sutejaca nia quiriquia, pueyaracaanu nia secojonura, Sesaaca mariqui juhua sare nia sareeri. ⁹Cumaatia nia nujuatariquia nojuaja, seetanujanaa Pueyasooe tiuujia nia quishacari. Majaari Pueyaso Rupaacuaji nia taacanunu. Naa nia miiriquiatej, nia niishishacari niarta Pueyaso pueyari puetunu tiqiyocuajanaa naa naquiya miiquoyajuhua. ¹⁰Niaa jaara rupaquijia naquiya miishaariquia mijiria, Pueyasoori na nuhuaji nia jataniniutianiya tojetaarucujanaa maninia pueya nia quiniuria.